

卷

施

閣

集

卷施閣文乙集續編

東阿尋西楚霸王墓記

管履之先生告殯文

董太夫人怡老軒序

原師

原友

家慶圖序

食榼銘

酒器銘

書室銘

董夫人哀誄序

黃金臺弔郭隗文

亡友林嗣基詩序

贈朱先生石君序

聖駕五巡江浙賦

聖駕五巡江浙代四省士民謝表

送舍弟南歸序

皇帝南巡詩

并序

祭尙書錢文敏公文

送吳穀人先生乞養歸里序

鉏月閣記

乞假後上成親王啓

送陳嵩歸里省親序

祭畢尙書師文

諭祭提督花連布文

祭王秉玉駕部文

祭劉汝器同年文

福郡王專祠碑文

諭祭孫士毅文

三壇祈雨文

遊積水潭看荷花序

卷施閣文乙集續編

陽湖洪亮吉著

東阿尋西楚霸王墓記

予以屠維之歲始夏之月夜抵東阿舊縣與舍弟及長白
繆君尋西楚霸王之墓維時暑日傾谷炎風滿山元扃旣
臻雙壠兀立尋碑讀之云有李將軍從王死實耐葬焉嗟
乎史遷不紀其名班氏弁逸其說獨使田橫之客揚義魄
于東潮彭越之臣振哀聲于西日予實恨焉且夫世之謂
大王者徒以淮陰歸漢范增去楚生有簡賢之名虞兮一
歌駿馬再歎死惟玩好之戀以此短大王耳詎知一士噩
噩剖心生前孤忠英英納肝身後如生之面入九地而不

灰已裂之背伴重墮而不瞑炎漢國士或構藏弓之寃楚
邦遺臣獨高埋鳥之誼大王之愛士至矣將軍之報主忠
矣是知三戶崛起得死士而能然一人從亡較興王而烈
矣天之亡也人何恨焉于是索茲村酒敬奠英魂昭臣主
之大綱破古今之殊說可知元松濯濯不偃漢家之大風
庶幾青隴陰陰猶上秦時之明月是爲記

管履之先生告殯文

惟城之南其谿有邗邈前修之構造逢古處之衣冠蓋味
道斯靜修德以安躬雖承乎世胄志較厲夫單寒夫其弱
齡克奮專學不遷旣孜孜而靡倦又恂恂而寡言稽昔人
之令德視先生而有焉是以折筭之訓不勞于童龀而入

秦之辨早異于髫年及乎隨伯氏而過征侍嚴親而遠仕
炎墟則龍浪千重天險則虹肩百二文投西嶽擘秀嶺之
雄奇思拓南溟鬥靈潮之逸恣入關而襄治績初無志乎
貍鶉過嶺而佐清名并不攜夫蕙苴亦嘗積茲素學一試
有司旣靡志顛孫之祿自不染楊朱之絲遂乃發名山之
藏焚干進之策庭隅之陰晷勤于寸几案之課旬積以尺
經有十四均屬絕乎朱韋史列廿三靡不盈夫丹墨一樓
盤盤終日未下俗客擾擾十載不參披千箱于案左啓列
牖于楹南數城隅之近堞面晴郊之遠嵐朱穆貞孤絕塵
交于車馬子雲寂寞聯素識于芸蟬雖復譽起馮公之嗣
貴在延之之男隆以大夫之秩享以祿食之甘而鞶帶雖

磨拜

國恩而修愈厲華裾乍襲啓祕篋而思益覃者矣方謂草
元之歲方臻讀易之年可假欣杖舄之優游藉詩書而陶
寫乃霜初被野方報淒其訃已臨門偏驚逝者悵三千之
道遠鯉未趨庭值庚子之日斜鵬先集舍烏乎哀哉某等
咸在親知共傷閭閻悼賢相于朝端

謂相國程文恭公隕

哲人于里館雖隱顯之殊塗實賢愚之共惋馳銅車兮結
素旒道西郭兮望南州出無與議兮處無與謀少壯廢學
兮耆耄蹈尤前人已往兮逝不肯爾來者未見兮我心之
憂烏乎哀哉尙饗

董太夫人怡老軒序

怡老軒者少司農富陽董公入居

賜第別構軒于左奉太夫人所居之地也太夫人邠氏琅邪舊族幽薊吉門北海三傑合根矩而爲龍東州六賢並曼容而隱鳳西漢中興之相陰德及于千人東周上資之家富聲翔于百世太夫人承茲家業早著閨聲梅蕊披春雅有高寒之質石性在玉預含貞淑之資年未及笄卜云其吉絡秀之歸周氏欲成方雅之門泉邱之慕孟宗遂啓熾昌之緒時文恪公中閨在悼上秩方膺斗形垂北尙書則合象于璇樞星位從東陰宿實聯輝于參昴琴升筵而靜穆蘿附柏以柔嘉季隗之位非卑已列蘋筵之次燕姑之符更顯聿徵蘭夢之雙自歸文恪公而輔勤于室佐宦

于朝大宗伯方司天秩太夫人亦號禮宗兼隆內外之稱
並陸親疏之序勤于惠下高嶺之頰羣峯敬以承尊秀草
之希茂蔭而又釵經數質周親串之貧廩或頻虛饋宗閭
之急相此夫子宜其家人者焉泊夫魚軒旣乘鯉庭早貴
啓篋則文貂耀景列屏則豔采舒華然而太夫人尙御青
縑猶勤素業一裘適體同齊相之十年七襄在機勞魯姜
于五夜常之母必親魚菽之祭歎之家必聞紡績之聲成
茲令子旣丸膽于髫年愛此文孫復含飴于暮歲此則賢
而有禮宜登右史之編貴復能勤克著中闈之訓者矣時
少司農入司機密方接曜于中台崇安君出厯巖封亦符
明于列宿太夫人則調脂入戒封鮓貽規是以棠陰一縣

咸流愷悌之名金谷四司皆秉清勤之訓自家型國以教成慈太夫人之力居多焉蓋自少司農之貴而太夫人三膺

錫典疊荷

榮施儀成之號冠命婦之崇班大家之書著名宗之茂則十月二十二日入居于

賜第怡老軒越某月日卽稱六十之觴禮也雋母之移居官舍首垂家國之箴虞宗之別立養堂遞受公卿之拜德莫懿焉榮莫盛焉亮吉少司農門下士也謹受簡而爲之記

原師

立朝之節門內之行於世爲有益于學爲有用箴曰末學
孤露幼而無師願持此語沒世求之

原友

不以榮悴移不以毀譽惑不以身名之起落爲重輕不以
蹤跡之密疎分厚薄是曰性命之交吾得一人焉出處不
同而心跡可信趨向非一而精神自投是曰氣誼之交吾
得一人焉人品可以厚風俗好惡足以明是非是曰契重
之交吾得二人焉獨抒性靈遠跡風雅吾得一人焉研究
經籍時有發明吾得三人焉持身作文趨向甚正吾得一
人焉是曰文字之交交有本末禮尙往來吾得五人焉是
曰禮節之交箴曰古之烈士精貫日月微躬可蛻信誓不

滅

家慶圖序

夫立功立事者君子之懿行知止知足者達人之遠識必推其致皆有歎焉何則七葉珥貂富平寡審幾之彥兩疏息轍東海靡繼起之儔是則求之家國理尙難兼商之出處義非並愜若

誥授朝議大夫刑部福建司郎中趙先生者其兼之乎先生洛下名宗吳中世族七歲入學卽拜經書五世服官能通衣履少有奇童之目長有偉士之稱焉年三十起家戶部員外郎

國恩戴首祖訓伏膺元成泄宦有小韋少府之稱高密著

書守先鄭司農之教轉刑部福建司郎中時大學士兼理
部事劉文正公侍郎錢文敏公甚契之君詳求律意斷以
精心條厥重輕時書鄧析之竹和其顏色匪肖皋陶之瓜
上官謂任折獄之良足荷專城之任特疏薦之而君乞假
歸矣仲翁旋里益究公羊班游告歸惟儲秘籍雲谿者里
中之勝也君之居在焉因彼舊構廓茲新楹修竹過徑東
距蔣柳之居幽花壓籬南瞻徐勉之宅于是會茲華組盍
彼朋簪內史醉歸過里門而定下大農客至雖賤士而必
賓後進挹其清和薦紳稱其醞藉而且王鮑廉吏世著循
風崔柳大宗尤傳家法齋居峩峩舉諱日之禮筵几秩秩
嚴伏臘之祠鮑氏之園爲優不入晏嬰之宅慶季之車甚

澤敢陳叔豹之庭雍雍焉簡簡焉東南士大夫之模楷也
恭人葉氏幼有令德長垂閨聲接同室以禮撫庶弟以慈
仲升遠官惠昭臨北風而歎惠公坐法文姬陳先德以規
自歸於君而一室坐起不易方隅比鄰周旋靡聞語笑謝
道蘊不接尼媪無由知中閤之風韋夫人親課童婢咸能
窺六籍之旨時君令子懷玉球玉方以學行與東南賢士
交于是劉表致札首號太公王邑寓書必稱賤子廣陵陳
登見子魚而生敬魯國孔融遇元方而亦拜而先生亦禮
接後彥雅隆寒素春水浩浩樓開名士之筵車聲殷殷門
接長者之軫安昌侯精饌旬日必陳復陽國田租歲時屢
散有處貴能降居豐可約之致焉庚子歲上幸東南遂觀

于海處延覲道

九重頒內府之珍長卿奏名

天子悅大人之賦長君懷玉以

召試名在第三由諸生授爲內閣中書先生盛德之報肇于此矣

國家異數之寵萃于門焉明年先生又舉一孫于是長君懷玉屬友某爲家慶之圖遂假官歸爲先生及恭人稱六十之觴禮也世英未老已復抱孫文度乍歸時還登膝朱履塞徑門皆上壽之賓黃花映筵庭成益歲之頌亮吉于先生有連慶先生之獲福未艾也因爲之推廣世德發明賢風予以知

國寵至渥必萃旣高之門家釐實覃唯歸餘慶之室云爾
食榼銘爲孫季述作

山有木工度之裁作榼無不宜佐于飲食減于慮思非木
之好用代諷山樞之詩

酒器銘

長歡之室忘憂之樽子行節之無樂逾乎古人

書室銘

行無忘其實而據其名學無膠其跡而失其精無尺璧之
棄而浮聲之爭或出或處可亡可存庶靡踰乎素位以無
忝我二人

董夫人哀誄序

董夫人秦氏某官之女太子太保尚書文恪公豕婦今戶部侍郎蔗林先生繼配也爰自中閨夙成令質學遷之歲卽悟焚香識字之餘已羞調粉以祁祁之春日歸藹藹之吉人夫人則在貴能勤處盛斯降師敬姜之親績樂少君之蔬食秋鐙墮穗久伫深宵春樹浮花不遊暇日衣在身而數澣釵飾首而不華然而屢遭憂虞遂罹疾疾長帷曉臥空室夜驚夢吞落月甫孕靈童未閱歲星卽凋春樹匪環無再生之望緘篋餘已讀之編又況迢迢遠戍宛宛黃塵念弱弟之移巢值衰親之荷戟三旬望遠一日寄書余長而魂氣先離袖冷而啼痕宛在尙復饋姑飢勉相夫勤劬疾已居盲猶扶鳩杖恐先侵肺尙理朝衣調魚飧而勤

餐先雞人而戒且此則永逝之感較甚黃門蒙楚之悲逾于前哲者也先生門徒之盛著錄千人爲誅百輩禮吉辱承師命題序簡端所以廣達人之志著女史之闕而已

黃金臺弔郭隗文

屠維大淵猷陽月三日洪子尋燕臺之基眺無終之山維時三辰冠首九野圍足臨觴而思酬古以哭爰投文以弔郭隗曰

茲臺之成世去不停如何干祀而識子名非子之故憂心以愆嗟若吾子憑邀君靈世不待子子實以幸維子之幸國士以慶心馳劇叟足繭鄒生翩然來斯亦有樂卿嗟彼數子端居九京如何可作與子偕行無終峩峩哲王斯兆

敢因嘉日庶眺豐草元泉既涸墓石斯倒踟躇前事敬咨
華表百世飄忽亦既上饜維茲靈區跡或偶延木枯而壽
狸俊而言明明博物傳茲茂先茲來歆歔願訪遺事推誠
輸抱實感殊世泉臺雖掩猶憾吾子如何臨穴顧不從死
郎山西傾易水東出子今沉埋我未奄忽如遂顛隕願傍
子穴經千百年擬于駿骨

亡友林嗣基詩序

夫函宇寥廓非虛懷所可貯百歲浩渺豈朱顏所及待乃
有束髮而窮理要弱齡而振元風思馳六合之外議出五
經之表微言未絕其在人焉林公子嗣基者承累代之名
家爲一宗之蔚望旣趨庭而學禮惟彈琴以讀書惟靜也

故動植之性寓目卽知惟靈也故雲霞之辭探心以出顧
性習懶不甚涉筆又不示人也迨夫闔棺而詳私證破枕
而出遺文則有詩及文若干首焉異矣方歲在乙未太公
官江左之日賤子遊句曲之時遇于深坐默爾忘言溯夫
遊蹤神馬以企予又言吾友孫君之才于君子是三人者
眺高嶺之荒寒語幽窗之燭燼連騎而出一縣效狂傾釀
以酬賢妻泣諫人事盡乃幽譚鬼神狂交希或聯羣魚鳥
于斯時也雲出岫以忘歸風行天而自適矣未幾予奉諱
家居孫君亦悼亡旋里君省書悲惋憂二人之死也書簽
屢及寒暑乍周不謂此君遽先物化太公書來欲爲整理
遺集憂患匆卒久未報命及與孫君同客當塗相與悵談

前事三復遺編魂招小謝之山涕灑空江之側因頻夕不
寐編君詩文爲上下二卷嗚乎天地之大似無所待于搢
筆之士矣然而川幽入夜朗以清光嶽險頽雲扶于元氣
寥寥今古首首數人委荆榛之病骨猶孕靈芝吐山水之
奇思當輝秘冊不朽之事固精神所得主者也君之天又
何戚焉

贈翰林侍講學士朱先生石君序

蓋以蘭臺作史會稽介枚馬之儔廬江冠召龔之列未嘗
不歎金馬之英無聞治績朱轡之吏不入承明卽茲望族
以訪全才則南陽賢守本知禮以服官冀州循聲雜經術
而飾治以東漢之賢宗視西京之達宦其較優乎翰林侍

講學士朱先生石君輦下名家山陰舊族張勃之移居三世以受國恩元順之悟學九齡咸驚夙慧孝友植性禮樂滋身十行窮經史之書一室盡昏晨之節龍文乍試京兆目爲奇童鹿鳴甫歌當塗偉其國士以賈傳知名之歲爲終生入仕之年評其儒術推戴斗之無雙溯彼家聲云去天而尺五然先生方淵懷可挹績學者虛人莫窺其際也五年擢侍講十年陟學士爲河南主考官充南嶽祭告使五雀六燕平大匠之衡山虎川龍建使臣之節于是天子悉彼卿才試之吏治蕭長倩之爲馮翊雖曰外遷孫子嚴之厯數州將儲大用遂以翰林侍讀學士出爲福建糧驛副使正身率屬潔己愛民逾年兼攝福州府篆百事

具舉一州咸治俗有和合神者既奸民之創造爲淫鬼所
馮依車填一卷牲牢之祭何繁幕設三重土木之形尤治
飾薜荔芙蓉之服懼啓淫心焚都梁迷迭之香漸熏惑志
先生赫斯以怒卓爾而興撤屋而擴爲廡削象而投之海
付彼清流洗百年之邪穢條其甲令正一郡之人心擢本
省按察使先生外秉威神內持仁恕詢獄未竟方堦留涕
面之囚施德甫周圍室有革心之吏未幾以外艱去職高
柴過毀世以爲憂閔子免喪哀猶未釋服闋補湖北按察
使復調山西治皆如舊逾年卽擢布政使邊民則加額以
慶屬邑則望風而驚先生欲澄茲吏治故蘇綽六事皆簡
而不煩欲振此廉風故劉寵一錢亦辭而不受時今尙書

山陰梁君國治今副使仁和孫君廷槐與先生同官有浙水三清之目而人謂先生以數年卓魯之治存此州唐魏之風則尤有力焉七年請入覲是時

天子方釐四部之書啓三通之館開文淵閣以命儒臣重其選復畱公爲翰林侍講學士逾年入直文淵閣士論榮之持節十載復之禁林承恩一門咸居史職戊戌分校禮闈己亥主考福建以六經而取士類皆根柢之儒歷數省以程材稍挽浮靡之習冰雪之性惟悅素絲松柏之林尤無曲植當世服先生獎拔之獨至取與之不私焉維時先生厯官三十年矣人皆以歲方闕于五秩名早簡于九重以爲當出膺節鉞之司入昇經綸之任何武之徵旣

符素望王儉之相未改黑頭所以望先生者未艾也不知如淳注史史官班丞相之前夏侯釋經岳牧冠羣僚之首卽茲中外之所厯已極古今之崇班又況閩南代北家總戴其仁恩芸館蓬山世尤尊其偉著加以作宏農之屬吏皆有清名爲東海之門生咸思勵節導揚雅化扶植人倫何必儒臣非報國之官禁苑匪致身之極哉門下士以先生方屆五十而稱觴願乞一言而爲壽以某于先生交合辭以請某固識先生之行事而并知先生之心者也爰不辭而爲之序亦以見審槐里之節概尙有華陰守丞詳公叔之平生庶惟陳畱中郎云爾

聖駕五巡江浙賦

爲趙懷玉作

維

皇上四十有五載德日曜野威星景方信風條而壤綠仁
雲展而霄黃于是朔暨鳥籍炎訖狼臙川靜鯤壑陸洽龍
鄉黑質白章叶樂趨蹌丹仰翠吭與化翔翔蓋恩周乎四
世故慶極于八荒

皇帝爰諏日而舉五巡之禮庶僚方獻歲而進萬年之觴
然而

聖心方淵然以靜穆然以神邵慶典沛崇思旣精思夫至
治乃加意于勤民法天之覆師地之均配日之令象時之
仁倣斗車之始建眺原野之初春日麗天葩郊原始花禽
飛山迴麟動川華

一人和而自運萬騎寂而無譁周幽充之岡阜遵徐楚之
津涯乃停玉輅駐文駟駕凌雲之寶鶴浮泛日之仙槎霓
旌高而映漢珠露下而凝沙淮左名邦會稽古郡屏展帆
遙林長騎迅山戴德而增魏川凝恩而加潤百卉荷夫温
顏千巖榮其睿瞬彼於越與句吳實歡忻而振奮歌萬姓
于九達喜卅年而五覲蓋

皇上之飭吏也令頒之甲夜勤于乙鑿庶司之勤怠昭眾
事之得失神運乎千里知周于萬物山爲德川爲刑士惟
月尹惟日巡東嶽暨南嶽諭左列及右列條吳楚之民風
頌東南之治術莫不秉一人之謨以成百職之述而

皇上之愛民也或偏災之偶及捐數郡之所輸下方舟于

楚蜀給葑食于全吳而于巡省之地則又截上供之粟捐
所過之租仁皆銘于肺府化乃澤其髮膚是以黃童白叟
方趾圓顛靡不趨翠輦傍黃鱸冠朱纓而舞忭釋黛耜而
歡呼既履于河乃臻夫海洵洪波之効靈實廟算之所在
彼鱗臣與介伯奉約束而未改蘭橈旣施桂檝咸待烏銜
五色之珠飄展八葉之綵舒曠覽于中流數成功于厯載
鏡天光與水光平日采及月采省方之禮旣展校士之典
聿修葢以示博采寓旁收士有期于序進才無待于嚴搜
罔不獻醴泉之頌效祥鳳之謳星宮闕而給札雲幄啓而
瞻旂類飾磨而自獻冀擢異而升尤

皇心悅

睿思周

宸遊瀕

奎章富映綠字于山川煥丹題于苑囿攬轡而百韻成御
舟而千言就或瓊韻之抽新或瑤篇之疊舊起六籍而居
前陞百王而在後蓋自發

璇宮反神京登禹穴歷金陵清一百十日之蹕歡二十二
郡之氓雲祥雨潤岱聳川迎旣下孚乎民隱亦上暢夫
皇情渺膠庠之下士忻至澤之充盈蓋三衢所以祝天子
之壽而六符予以頌泰階之平

聖駕五巡江浙代四省士民謝表

臣聞天施五色丹黃宇縣之圖地應五聲宮徵巖原之曲

太平太蒙之野戴日戴斗之方狼隴烏澣之隅鼇巨龍蟠
之域莫不瓊雲增其晃朗璧日湛其清華甘露際其涵濡
皇風神其宣暢又況奎婁紀野十州爲拱極之邦婺斗名
區千里列敷猷之館歲二月東巡五月南巡虞典旣先于
西朔民一男二女二男五女職方首紀夫青揚是知龍行
九五雲霓之望尤殷巽主東南風雷之義斯著上法

天而次法

祖故典復懋于五巡仁爲夏而德爲春故澤先覃于三省
是則員顛方趾望幸旣誠而陰雨陽膏感恩尤甚者矣恭
惟我

皇上重熙累洽丕冒流仁巍巍著德宏四三六五之規濟

濟盈庭舉春夏秋冬之職垂衣

宸極則常明百二十四可名三百二十之緯悉拱北辰駐
蹕炎方則水經百三十七其注一千二百之川彙朝東海
蜺旌初指過金雞玉犬之郊鳳輦徐行增黃叟青童之祝
全齊半楚釋黛帑而瞻

顏兩浙三吳冠朱纓而引領其獨賦稅也屬邑減征繙之
牛會城寬租入之全供儲既足畱紅粟于看倉逋累均捐
慶黃醪于白屋其廣錫予也道在棄瑕爰復已褫之帶資
惟念舊則有更賜之環防河之吏既晉新班煮海之商亦
邀渥澤其優老也萬乘之所經黃髮賁朱提之賜百年者
尤異齡顏隆絳帛之頌其肆赦也殷綱寬而圓斗有措刑

之瑞禹車泣而下杓無填嶽之星其講武及顓俊也憲瑞
光而張武伐映奎壁而試文人風迥周廬雲日獻禎祥之
頌星馳員陣山川明組練之輝其觀于海也波平龍氣頒
玉瑞于重淵石密魚鱗益金堤于萬丈其禮于山也東岱
則典隆于青壤爰馳牲帛之儀南鎮則祀重于朱鄉親展
登封之禮其勤政及飭吏也五品以上多晝接之人萬幾
之餘勤宵批之諾甲宮旻食聆虬箭之紆徐乙夜求衣聽
馭鈴于蹀躞而其尤盛者則孟門砥柱未慶安流鉅野吾
山難歸故道司農五百萬金以役數州之力河臣上中下
策尙稽三載之期乃朱旗泄野而日麗天青蒼輅臨河則
波平鑑紫泉沉黜憤三霄尙裊夫神香堤亘銀虹千里如

遵夫

睿約高下之颺車電馬齊歛元旗東西之龍首魚身咸移
黑壤千人畢力排萬礎于蛟宮一日宣猷冠雙堤于鱗屋
此則靈源德水唯馳甲乙之帆高堰長淮克靜庚辰之鎖
蓋駭浪初恬人謂待

聖人之南幸亦

虔衷上契于以挽巨壑使東行源于天上長徵瑞應之圖
行自地中永紀

至人之烈猶復下再三之

詔降寬大之恩均頒犁犢春耕徙浪之田普錫金錢食給
衝波之宅使究豫上流蒼赤有安生之樂徐揚水滙清黃

合順下之規凡茲靈應悉本

誠符惟此

鴻謨益徵

慶趾祝三百六旬之初

恩綸早徧故億萬斯年之祐薄海咸歡

臣等

膠庠下士海

甸烝黎山邦左右淮土東西江水北南越鄉近遠欣逢

盛世旣五觀夫

慈顏快覩昇平復頻承夫

睿訓不勝感激慶抃之至謹合繕表以聞伏惟

聖鑒

送舍弟南歸序

歲屆孟春節逾元夕舍弟以幽憂致疾一句之中啜食者
再申旦之內咯血以數蓋燕臺夢冷不無意于鄉閭蘇生
裘敝鎮淩其于雨雪對寒風而隕涕盼南雁以傷心而行
遂不可緩矣反因遠別索我歸期嗟乎麻衣易采久非定
省之辰聖室消朱無復門閭之望守高堂之素纓保護于
風塵逋阿姊之青錢延回于力役然而容歲十五征程入
于識人問之路甯作歧羊指原上之松終歸病鶴勉旃吾
弟鑒豫公之薄志無辱飢寒念曇首之中年當持門戶瞻
望不及伫立以泣

皇帝南巡詩

并序

臣某頓首再拜言臣伏見

皇帝陛下于今歲正月之吉遵

聖祖仁皇帝成法五巡江南蓋自旃蒙作噩歲至此越十六年東南之境揚越千里雲霓鬱其深望涵濡際其厚澤冠朱纓佩韋帶風險雅詠之士馳銅車垂素髮澤耕澗釣之儔引領接踵晨夕以冀而

皇上又于其間展東封之禮告西討之捷幸闕里而蹕與京于是江浙大吏循例以請

皇上亦念東南望幸之誠值時和歲豐國家慶祉之會迺

下
詔俞焉戒

鑿輿諏吉日發軔冀野

制蹕吳會于是咨民瘼察吏治截漕粟寬租賦蠲逋積釋
罪繫修山川之祀優耆老之典勅戎具登俊秀湛恩駁施
有加無己又

蒼輅所屆河堤告竣遵海而觀

密畫以建至矣夫一遊一豫之諺可久可大之規比于先
王觀爲後世法者矣臣不敏慕車攻卷阿之在雅與時邁
般之頌咸以形容盛德紀詠功烈被金石流絃管今其如
何而闕斯作輒不自諒謹賦詩千六十四字上以紀

皇帝文武神聖中以達士民愛戴之忱下庶竭微臣夙夜
之職其詩曰

皇帝御極四十五載盛德累洽大慶以會含生熙熙乾悌

坤闔乃眷東南屢膺豐歲

皇帝曰咨惟十六祀大吏之章一至再至惟朕法天不可
以怠省方之典

祖德克配歲惟元日九門曙啓泰陽升中盈尺雪霽帝御
正殿百辟侍陛洞洞穆穆以達嘉氣國家慶祉布告中外
惟雲之垂其澤皚皚

皇帝曰咨以廣錫賚惟風之行蕩彼覺穢

皇帝曰咨以赦有罪惟春徂秋農野告瘁

皇帝曰咨逋征悉勾惟冀及揚六虬所稅

皇帝曰咨上供咸貸臣之祖宗慶典均霈懷勳錄舊孫子
亦迨我我雙闕九門軒墀赫赫升龍

袞衣以繪凡百在列服貂耀綵朱纓拊舞仰燦其翠醴潔
于尊羹調于瓊盈庭

錫讌禮成而退登壇祈穀方展青旆先時而雨足灑座盞
風和于旂會不向背萬騎隨龍不震不駭川原高下春至
凍解益以和豫光翔大塊睽惟河流屢築而潰

宸遊旣屆不復泛溢魚身龍首川欽百怪臨流而禱牲黜
玉贖曾不呼吸默鑒已在川祗奉令河伯震駭一日之功
隄成百排揚徐充豫以堙以灑

帝心旣悅眾亦愉快天惟左旋

帝亦東邁東南之民視昔復倍傍舟而趨陸視星檣前之
黃髮番番未改昔之兒童鬚植于頰于于扶杖或釋其耒

戴

恩于首獻曝在背自髮至踵悉化所逮化之所逮靡有外
內豈惟含性生植既漑豈惟秉靈毛羽亦遂揚州之境浩
浩富水會稽具區以海爲委惟

帝曰咨鴻流巨派原資耕鑿川以育介人民魚鼈立堤而
界積葦爲塘或恐易敗易之以石久乃勿壞吏秉

廟謨防築靡懈

帝行度之靡所勿屆

帝之勤政勞于訓誨上自督撫下迄庶吏章程旣立戒勿
苛碎守官之箴訓以勿賄目其勤怠以課殿最苟或不力
高位亦汰職之煩省

乙夜以搗或易而居政乃威賴微長可錄洗濯皆累戴愆
之吏或復褫帶

帝之所行州衢闕閭

帝之所念畎畝溝澮截茲漕粟以實倉廩民皆四顧視尙
若餒爲思其利并悉所害禽之催耕其羽翩翩飼蠶之葉
抑何旃旃

皇心悅之引以相對進茲稜稜喬野無礙上恬于下民俗
以泰乾坤蕩蕩以成其大惟此大和烝爲人瑞百歲之老
駢躋拜跪子惟耄耄孫亦逾艾年至禮加帛錫表裏征賦
旣蠲復饒粟米雞將其雛犬狎不吠兒童蒸蒸飽食以喜
天顏旣覲均不悚畏咸拱屬車千狀萬態父母于子蓋無

不愛

帝之視民亦若斯類草木齒角悉與盼昧

行宮之側獻頌百輩

帝皆省之悉報以幣或與釋褐試之在位膠庠慶洽較此
營士熊羆貅虎雷驚電駛文德武功靡不畢試

帝之旋蹕召吏以戒塘功既竣親展珪玠凡茲

行館第掃以洒蒿官可居戒勿雕畫茨階可翦勿繪以彩
無增于前以獲咎悔維茲大吏稽首以唯同聞茲命草野
悅慰凡

帝之巡

至澤汪濊超三踰五邁蹟義代歲惟涪灘展禮東岱巍巍

闕里肅志進謁

興京再幸復比豐沛洋洋川流長白睢睢東南之望山聳
川待河渠海流實資經緯維

皇之至雲屯星萃惟

皇之旋霞蒸澤滙艦名安福帆曳瑞霧

法宮告至慶賞以槩頒乎從臣以迄環衛遠方來朝集此
軫蓋受餐

賜邸以勞以徠合璧日月五星耀彩榮光成嶽元氣爲海
奚斯吉甫臣頌不愧億萬斯年以引以戴

祭尙書錢文敏公文

惟公生稟公忠死稱純孝大節無慙神人以倣巖巖者烈

赫赫者稱敬因祖桓請頌平生伊公篤生哀于武肅明德
達人鍾祥太僕公之府君爲邑祭酒峩峩一家擅三不朽
髫齡之兆實惟文明龍首之一公以策名旣登史館復試
于廷揮毫奏賦璿璣玉衡人亦有言賡歌小心公官卅載
回翔

禁林洎隆

主知久膺司寇豈惟明愆三赦三宥番番之律并陷于川
平平之執星飛于垣公之先世荒政盡職暨公平反彌種
陰德坐公于堂有睟其容匪瓜之削伊玉之豐黔陽之獄
帝資明決惟公旬日折獄以七苗民生育惟疆之居值茲
破蠶蠕蠕一隅沿江瀕海

左勦之撫之

天子命我惟頑之苗醜唯香要顏行敢抗潛軍躡逃歷佳
居南暨朋論北誰从我公簡兵以百霧歛旗紅雲頽陣黑
炬火宵明曾旌晝匿兀兀熊羆公坐軍門文金蠻布招之
以恩豈惟捷威遂殲厥魁豈惟撫緝遂布厥德巖山惟明
天風掃氛誰從公遊摩崖著勳昔紀之師實惟文成唯公
贊術苗民目驚秩秩苗疆碧塍紅壤

天子思公鼓鼙致愴人傳三絕實公餘事惟畫詩書文敏
有四凡茲數端實結

主知煌煌

天語疊賁于斯憶昨南歸知公病消同官諮度
宸衷以勞暨歲之春

帝謂諄諄披圖進冊慨焉斯人元封誅宏鴻嘉贊趙方茲
遭際未輜洪造殞公于堂經夏衰裳碩儒秉禮善公居喪
烏乎大雅無常哲人有數前悼司空

劉工部
星焯

後悲宮傳劉文

定 矧公偉烈尤著

皇家何期箕尾同值龍蛇凡茲之卒鄉閭誰式零雨其蒙
愁狸四塞唯昔家居感深寒素實愧下交踵門徒步惻愴
生芻兩踰兩壺冠車莫遏神已屆塗於乎尚饗

送翰林院侍讀吳穀人先生乞養歸里序

嘉慶二年三月上巳日吾友翰林院侍讀吳君乞養南歸
其同歲生洪亮吉招同志之朋乘入直之暇餞之于卷施
行館于時嘉樹百本紅猶未敷春蕪一畦綠尚難藉弋連

林之鳥釣深澗之魚天目之筍云惟土膏山陰之樽不殊
家釀爰舉觴而送之曰君之歸也有五樂焉鬢縱頰白衣
猶純采陟岵陟屺三詩合歌倚門倚閭二老咸在集中申
之羣從慶皤皤之黃髮伯始之宦旣達呼之以名文度之
年雖長登之于膝此則五十而慕視猶折蓂之時八旬有
奇健逾遺種之叟其樂事一也比二千石可云尊官垂三
十年鬱爲前輩陳宗之校東觀旣在孟堅之前桓郁之授
禁中僅處仲弓之後又況楚遊設醴正待穆生東平奏牋
首推李育子虛大人之賦上客傳觀甘泉洞簫之篇貴人
成誦甚或賦西池之句寵厥始行設東都之帳惜其欲去
其樂事二也未離交道之廐已置當時之驛青齊才士位

望其前旌廣陵達官預開乎曲宴牛腰之軸堆案而索題
魚腹之書封緘而俟啓瓜步尙遠垂虹之舫已迎蘇臺既
離如龍之馬尙送莫不相見恨晚圍觀若仙其樂事三也
百川奔注東海是曰蹄壩羣才挺生曲江實惟都會西則
三江五湖南則八閩百粵陸路之馬多如風鴉水程之帆
密若星顆離亭折柳手倦于攀條紫陌賞花目迷于辨色
交友盡一世會未越乎門庭爲客設八珍要不離乎水土
其樂事四也以視膳之暇爲著書之期左思旣敗之筆雜
貼案頭管甯未銳之榻不離門右籠鵝館關偶爾習書步
崔汀長卽供覓句孔鯉之經學多得于過庭揚雄之法言
半成于閉戶其樂事五也僕自惟孤露之餘忝宦百僚之

末然非天下之士不交非經世之書不讀堆案數尺書淫
自嘆臨墀百觴酒悲不免惟此數子庶幾同心賴國武之
盡言成遽瑗之寡過永此夕朝藉慰離索乃今者西行數
騎時張船山以憂歸險欲上天東去一帆勢將及海罵田蚡之坐
已乏酒狂移江敦之牀將排俗客弔影自處攢眉無聊繫
花紅于窰中春艸青于屋上視此風土彌懷鄉里行亦買
艇十尺驅車兩輪歸休于吳訪子入越茅容殺雞雖不及
客范式醢酒或當迎賓山川渺然來往無間此則向西而
笑咸有待于他時徂南之思庶無忘乎歸宿云爾

鉏月閣記

鉏月閣者延陵主人讀書之所也其地也交徑四出惟植

疎梅閒屋一隅滿貯明月每當殘雪欲淨條風乍祝疎花
半簾香意一室雲外之雀不招而自來巢樓之禽戀影而
忘去招邀羣從爰集勝侶洞簫鳴于閣中琴韻飄于塢外
陶陶焉灑灑焉此閣之所以名也其外則山積萬丈溪流
百折大石兀立飛泉布空幽徑過鹿時時一鳴危潭出魚
往往五色陰厓霰零當晝亦暝溫澗氣暖過秋仍花此則
漸江汊水或與共源天都齊雲此爲合脈者矣其內則一
几數榻前堂後軒畫則顧愷一廚書則荀勗四部蠻紙萬
幅有沈約手鈔之書隄糜兩螺爲李尤自製之墨胡蝶過
牖時尋幽人芭蕉拂塵不延俗客因樹之屋何以過茲鑿
坏而居斯其足矣僕姻結中外交兼紀羣少日攬勝疑嘗

過門先人結廬近不數武他日給金門之假過玉山之居
任昉之米色如桃花琴高之魚銳若竹葉主人其飯我于
閣中乎是所願也

乞假後上成親王啓

亮吉猥以下士獲趨三天侍左右者歷時陪清譙者不一
方冀東海傳相稍窺卓爾之端章城大夫頻聆富哉之詠
甘醴旣設兼容酒悲芳醪偷交何止心醉恕其迂疎備奉
恩渥亮吉幸甚死罪死罪乃者元枵入命予季摧殘浮梗
斷萍痛心疾首侍從請急非厭承明之廬葺功去官亦準
古人之例臨別惘惘殊難爲懷又蒙從檢討張君傳諭屬
以節嗇語言韜晦楮墨此則吾鄙狂簡非夫子而誰裁飯

生偏奇幸大府之是正他日冀寡伯玉之過以答斷金之期如是而已昨暮復詣澄懷園爰升北岡引眺西墅松竹之翠與祥雲共浮麟鸞之洲視天闕同迴斜陽西馳新月東上感逝惜別兼念德意如何如何謹啓

送奎文閣典籍陳嵩歸里省親序

柔兆執徐之歲予自黔中入都卸裝閑廛僦屋瑣巷于是有挾素業以就質操鄉語而通款者則如臯陳肖生也望衡對宇幾將一周連輿接茵會不間日越歲二月陳君將歸爰擇令辰集勝侶挈北地之果醞南中之樽以教以遊卜晝卜夜所以申聚散之感極欣戚之致焉蓋其人也超超不羣落落自喜逾叔夜之疎嬾有周郎之偏奇病渴旣

久反購茂陵之姬斷餐不顧方招東國之友賃地一尺必
栽梨桃租居數椽先貶彝鼎衡門晝閒遲不速之友蕭寺
夜入繙無礙之經有勸以疎樓護之故人接陳遵之要客
徙居綏福之坊屏跡蕭閒之里者君不以彼易此也其官
也儒林丈人南閣祭酒周初舉世不離乎王門景丹四科
乃官乎國邸而且研摩六藝總領羣經類陳農之訪書同
子政之校閣從大夫之後豈曰能賢近聖人之居是亦爲
政卽有諺六曹之要陳三館之清矜再命之榮後一邑之
富以耀之者君不以彼易此也其家也大江流其右碧海
居其左積沙成田陽侯代其灌溉因樹爲屋野鳥與之毗
依螺蛤滿港以供丈人之餐潮汐過門無煩少婦之汲遊

心入堦極目千里卽有以市南閩之蔗橘販北海之魚鹽
羅東莞之珍奇輦西秦之玉石以動之者君不以彼易此
也其業也願愷一廚宗測數障涉筆偶及五嶽成乎以遊
含毫自如四序由其變易敗紙退筆與篋笥之衣競夥殘
朱剩黃視妝閣之粉尤富一月之內面壁者乃有二旬六
時之間據案者或過卅刻此則蕭賁傳世詎假親賢野王
發名不由學業卽有陳九歌之詭麗摩六發之雄奇狀左
思之賦十年述曹植之詩七步以敖之者君亦不以彼易
此也君行矣偏親在堂室老無恙雖客路千里續命之丹
屢減而星紀二周當歸之藥頗寄遠遊有戒去日苦多則
于君之行也詠南陔白華之什以代折揚黃荅之曲可乎

祭畢尙書師文

烏乎公之生也大海來潮八月之望氛霾始消風車電馬
集此崇朝公之卒也大星墮地七月之朔秋雲陰翳萬竄
無烟千屯雪涕陟壺頭之絕巘升郢郢之南門髮紛披而
雨泣望瘴水而招魂尙聞遺語一息猶存闔臣以之入告
天子感其忠純烏乎公之勳績國史書之公之心跡

聖主所知矧余小子友又兼師敢同游夏庶贊一詞公之
牧民務培元氣旱潦凶荒先時而計畜牧屯田河渠水利
雍豫遺民思之不替公之馭吏惟總大綱或寬以濟猛非
弛而不張擁旄齊楚建節秦梁自非黠吏誰挂彈章公之
涖師視同一體馳赴荆襄星馳辰澧公去卽憂公來則喜

翟苻纒戢山嶽遠圯公之愛士出於至誠孔既傲吏躡亦
狂生談經賈服作賦行衡兼收並畜賓坐縱橫公之詩文
氣包宇宙海立山飛天施地受雲霞蒸鬱雷風馳驟體備
四時胸羅全宿五言正始一品會昌春坊劉陸樂府張王
儷詞景福聯句柏梁三唐以降誰抗顏行若夫盼睠非常
科名異數出總節旄入膺保傅雖

聖天子之知人亦公之事業文章裕之有素烏乎憂國忘
家祭征虜之忠也鞠躬盡瘁葛武侯之志也佗日者覽章
疏而追思聽鼓鼙而出涕吾知淩煙之象贊太常之謚議
或不在乎一時而定有以垂乎奕禩亮吉夙蒙國士之知
久處賓僚之位狂瞽時陳而公不懟敢緣恩義敬設几筵

以頭搶地以口呼天烏乎東里子產明明有言夫子而死
吾其已焉

諭祭提督花連布文

蓋臣報國藉決脰以明誠愷史策勳必原心而論事匪茲
茂典曷妥忠魂爾提督花連布早秉忠勤夙嫻韜略由羽
林而外擢率爪士以西征克振邊威用膺閫寄建牙三楚
傳儒將之風流持節百蠻致遠人之甯謐昨以三苗蠢動
俾隨上將芟除首厲軍鋒統埋根之勁旅頻馳露布申參
具之戎威用是特晉宮銜屢蒙上賞方冀竣功不日光顏
開胙土之勳詎期轉戰無前重捷有結蒲之痛以忘身而
殉國用逾格以酬庸烏乎銜溫序之鬢旣後先之競烈繪

陽都之像庶存歿之兼榮魂而有知尙其歆饗

祭王秉玉駕部文

烏乎君之生兮官北部而捷南宮較士窮而不遇今亦可
云豐君之卒兮背衰親而遺弱息會下壽之難期兮抑何
其嗇感蜉蝣之身世隨螻蛄而俱遷自交君而哭君會不
逾乎廿年憶歲丙申值君里市我時交友不可一世酒徒
六七爰有孫楊攜瓢持杓置甕在旁圍觀一市君哂其狂
及客汴中歲維丙午我時研經君亦攻苦是時執友嚴邵
錢孫連閭握管各號專門一鐙達曉君服其勤泉歲丙辰
我還京國君已沉痾望君門側自春之首逮此秋初我司
編校髮懶不梳十旬三至君訝其疎冀君之生不虞其死

命蹇如何才豐若此朱顏二婦白髮一親憑棺之痛哀感
衢人謂君有知哭矣不省謂君無知目胡不瞑烏乎疇昔
之夜兮夢精廬于北城惟同門之舊侶兮實閭左之吳生
君未第時與吳大令伯升
讀書城北三塲巷最久死將淪爲異物兮生卽依乎眾
塲緬軒窗之幽迥兮有手植之疎楊冀墮地之靈光兮化
升天之殘月照屋角而橫斜兮影向晨而不沒否則秋蟲
萬種涼雨一庭颺簾紋而牖黑聚魂氣而燈青烏呼王君
靈爽斯在其來施施歆我脯醢尙饗

祭劉汝器同年文

烏乎與君之別乃在京華我持蠻節君泛歸槎與君之交
乃在西蠡君時研經戶常不啓君之家世累葉清門承華

藉蔭宰相之孫君之詩筆乃學徐州雲孤而峻水折乃流
君之文章遠師吳郡鴻雁高騫驕駟奇駿君之孝友人所
難能屢分薄產以俾弟昆君之締交久而彌摯王貢蕭朱
始終一至歲惟庚子聿與同升凡茲多士並慶得朋隴西
之門褒然舉首以德以年君皆祭酒冀居要職冀擢清途
庶幾偉抱藉以發抒如何如何五上不偶既慳高第復屈
下壽林宗之隕士彥之亡凡有知識云何不傷烏乎董京
之社黃公之墟我歸哭君三江五湖尙饗

福郡王專祠碑文

朕惟才爲命世方成不朽之勳恩足酬庸聿有非常之典
既聲施乎內外斯禮備乎哀榮光我鼎鍾視茲典冊爾大

學士晉封貝子加贈郡王福康安系出高門幼稱偉器爰
自成童之日卽爲筮仕之初恪恭早著于禁林統轄並參
乎戎政遂擢貳卿之任兼趨密勿之廷六詔省親訪遐方
之雞馬三川持節領別隊之熊羆早以軍功肇開土宇三
京鼎峙仍膺專閫之司萬里風行儼有長城之望入則綜
平部務出屢歷乎巖疆惟倚畀之逾隆乃賢勞之懋著八
膺節鉞歷川滇閩廣而遙五預戎行涉瀚海天山之外朕
嘉此盡臣拔升端揆自綸閣而機廷人美韋平之世德由
統軍而馭吏世傳韓范之威名昨以苗蠻不靖俾由黔楚
專征屢奏膚功克擒首逆佗見全軍之奏凱忽驚末疾之
加增隕我棟梁悼深朝夕旣備飾終之禮復思垂久之規

爰命有司爲之度地創茲靈宇以妥忠魂嗚乎國勳旣建
廟食斯宜況復功在八州陶侃終上卿之位階超五等李
晟封異姓之王在乎前代已屬殊榮至若本朝尤爲創典
桃桃俎豆近家廟而建享祠赫赫旂常諭禮官而頒上謚
此日特開朱邸並加崇先世之封他年共讀穹碑庶永作
勞臣之勸

論祭大學士孫士毅文

朕維効力宣忠克著崇勳于中外褒勞賜卹永隆寵錫于
初終視此蓋臣乃膺異數爾大學士孫士毅早自甲科聿
官秘省著辛勤于內直襄密勿于機庭外擢曹司內兼要
職南中視學克流詳慎之聲西粵陳藩不愧公明之譽遂

膺特簡擢撫南滇旋以同此職司當代渙于而受譴然且
鑒其心跡庶同高允之歸誠免彼荷戈俾隨簪筆寵以詞
臣之職旋升典禮之官爰再厯乎撫藩乃益隆乎倚畀總
百蠻之節鉞峻秩頻加勵兩省之官僚庶聲漸著惟此海
隅之屬國偶勞天討之時加爾以督臣實司軍務始則屢
勤乎行陣命榮兼五等之封繼因未協乎機宜仍內領六
卿之秩既專司乎邦政弁襄職于樞庭世職官銜用沛酬
勞之典石城劍閣屢標分陝之勳朕嘉此悃誠拔升端揆
景武則綰寬佐治經術素優熙豐則韓范行邊威名久著
昨者苗方之蠢動俾預師于今茲教匪之芟除亦資學畫
據川湖之要道清來鳳之兵氛而且張詠抱疴尙欲定蜀

中之戶樓船占籍恥猶爲關外之人自非忠悃之夙孚曷
以彌留而入告嗚呼視上公之典禮用備飾終延後嗣之
勳封足酬盡瘁庶幾靈爽歆此光榮尙饗

三壇祈雨文

維神化溥廣生德含嘉種協庥徵而錫福降闔澍以隨時
當待澤之維殷宜臚誠而默籲維今歲上辛禋薦祈百穀
于

天宗吉亥勸耕習三推于帝籍旣昭懋典屢荷甘膏乃春
渥雖饒慰良農之緯耒而夏霖未沛厖清叻之扶犁業致
禱乎靈湫用虔祈乎昊絳庶念迎豐之悃冀邀獲稔之祥
應水德于土龍特敷鴻佑聽田歌于秧馬實賴神功期蕃

殖夫百昌俾照蘇乎五沃尙其鑿格徧我公私謹告

遊積水潭看荷花序

積水潭者長河入城之所清而淨業湖暨太液池又導源于此者也潭去德勝門不數武地居半坊水積百頃澤氣浸潤黃雲四生堤形回環紫蘚尺厚飛塵止于戶外生翠出于楹間枕簟左右時穿鷺絲牕櫺東西不斷煙靄鼃龜上樹與苔錢共青魚苗出波同荇葉爭綠松檜百尺時隱丹樓榆檀四周間以粉堞此則魏闕之裏儼有江湖之思燕垂之南不殊吳會之域雖然官司之守存焉非遊屐所能及也若石樓大令之晏客也遠從赤縣挈此官府復向水衡假茲 禁藥列宿之數嘉賓適符北斗以南魁士咸

集旣忻花晨復值涼曉繪樸起于俄頃竹幄設于崇朝鶯
燕合隊是爲春聲梨桃滿枝間採秋實馬過橋而倒景舟
沿岸而溯香荷葢蔽日威擎一枝柳絲搖風時攬數尺飲
碧筒之酒莫喻其芳華烹紅鯉之羹難名其鮮潤披林陰
而作圖坐石隙以聯句雉堞之影排比乎衫裳禽蟲之聲
出納此絲管涼透木末思舉霞表蓋洛水盛會意宜光之
後來山陰再遊悲逸少之旣逝謂王通副友亮亦可以志友朋之
離合寓今昔之感慨焉時同遊者歸安戴璐蕝塘揚州羅
聘遯夫湖口周厚轅馭遠奉新甘立猷維弼汾陽曹錫齡
受之仁和馬履泰叔安浦江戴殿泗東瞻武進趙懷玉億
孫儀徵汪端光劍潭蒙古法式善開文南城章學濂守之

歸安葉紹棿琴柯嘉興戴堯垣衡三代州馮成百史甯化
伊秉綬組似永康熊方受介茲奉新宋鳴琦步韓烏程沈
琛右侯句容孔傳薪楚堯筮立樞繩齋靈石何道生蘭士
汾州李調鼎吳縣金學蓮子青南豐譚光祐子受曲阜顏
崇榘吳縣石韞玉執如遂甯張問陶船山皆紀以詩而屬
亮吉爲之序云

卷施閣文乙集續編終

曾孫用懃校刊